

DOMENIE XIX «VIE PAL AN»

Antifone di jentrade cf. Sal 73,20.19.22.23

Ten fede, Signôr, a la tô aleance,
no sta dismenteâti par simpri de vite dai tiei biâts.
Jeve sù, Signôr, e pare la tô cause,
no sta dismenteâ lis suplichis di chei che ti clamin.

Colete

Diu onipotent e eterni,
che si permetìn di clamâti cul non di Pari,
colme tai nestrìs cûrs il spirt di fîs d'anime,
par che o podìn jentrâ a gjoldi l'heritât imprometude.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Sap 18,6-9

Come che tu âs cjastiâts i avversaris, cussì tu nus âs quartâts nô, clamantnus cun te.

Dal libri de Sapience

La gnot [de liberazion] i nestrìs vons le vevin cognossude denant trat,
parcè che, savint di sigûr a ce zuraments che a vevin crodût,
a vessin il cûr content.

Il to popul si spietave

la salvece dai juscj e la ruvine dai nemîs.

Parcè che come che tu âs cjastiâts i avversaris,
cussì tu nus âs quartâts nô, clamantnus cun te.

I sants fîs dai bogns, di scuindon, a ufrivin il sacrifici
e ducj insiemi si àn imponude la leç di Diu:

che i sants a varessin spartîr te stesse misure

la lôr furtune e i pericui,

cjantant prin lis lauts dai vons.

Peraule di Diu.

SALM RESPONSORIÂL dal Salm 32

R. Furtunât il popul che al è dal Signôr.

Gjoldêt tal Signôr, int juste;

ai bogns ur sta di laudâlu.

Furtunade la int che il so Diu al è il Signôr,

il popul che si à sielzût par ereditât. **R.**

Ve, il voli dal Signôr si poe sun chei che lu rispjetin,

sun chei che tal so boncûr a sperin,

par sfrancjâ de muart lis lôr vitis,

par tignîju in vite in timp di miserie. **R.**

Viers dal Signôr e brame la nestre anime:

al è lui nestri scût e nestri jutori.

Che al sedi sore di nô, Signôr, il to boncûr,

parcè che dome sun te o stin fidâts. **R.**

SECONDE LETURE Eb 11,1-2.8-19

Al spietave la citât che il Signôr al è architê e muradôr.

De letare ai Ebreus

Fradis, la fede e je la fonde des robis che si spere e la prove di chês che no si viôt. Al è midiant di cheste fede che i vons a àn vude une buine testimoniance.

Par fede Abram al à ubidît a la clamade di partî par une tiere che al veve di vêles di legitime, e al è partît cence nancje savê là che al leve.

Par fede si è sistemât te tiere de promesse come tune tiere foreste, vivint sot des tendis, come ancje Isac e Jacop, erêts cun lui de stesse promesse. In efiet, lui al spietave la citât des fondis saldis, chê che il Signôr al è architê e muradôr.

Par fede ancje Sare, seben che e jere fûr di etât, e à vude la pussibilitât di diventâ mari parcè che e à ritignût di peraule chel che jal veve imprometût. Par chel di un om sôl, e za segnât de muart, e je nassude une dissendence grande come lis stelis dal cîl e come il savalon ad ôr dal mâr, che no si rive a contâlu.

E te fede a son muarts ducj chescj, seben che no àn podût vê ce che ur jere stât imprometût; lu àn viodût e saludât di lontan e a àn dit di jessi foresscj e pelegrins su la tiere. Chel che al fevele cussì, di fat, al palese di jessi daûr a cirî une patrie. Se a vessin pensât a di chê che a jerin saltâts fûr, a varessin vude la pussibilitât di tornâ; lôr invezit int cirivin une plui grande, tant a dî chê dal cîl. Par chel Diu nol disdegne di clamâsi il lôr Diu: parcè che par lôr al à prontade une citât.

Par fede Abram, metût a lis provis, al à ufiert Isac e propit lui, che al veve vudis lis promessis, al à ufiert il so unic fi, chel che al jere stât dit di lui: Tu varâs in Isac une dissendence che e puartarà il to non. Di fat lui al pensave che Diu al è bon di fâ resurî ancje dai muarts: par chel lu à vût indaûr e al è diventât un spieli.

Peraule di Diu.

CJANT AL VANZELI cf. Mt 24,42-44

R. Aleluia, aleluia.

Veglait e tignîtsi pronts,

parcè che no savês in ce di che al ven il Signôr.

R. Aleluia.

VANZELI Lc 12,32-48

Ancje vualtris tignîtsi pronts.

Dal vanzeli seont Luche

In chê volte, Jesù al disè ai siei dissepui: «No sta vê pôre, piçul trop, parcè che al Pari vuestri i à plasût di dâus il so ream. Vendêt dut ce che o vês e daitlu di carità. Fasêtsi sportis che no si consumin, procuraitsi un tesaur sigûr in cîl, là che i laris no puedin rivâ e lis tarmis roseâ. Parcè che là che al è il vuestri tesaur, li al sarâ ancje il vuestri cûr.

Viodêt di jessi simpri pronts, cu la cinturie ator dai ombui e cui ferâi impiâts. Viodêt di jessi ancje vualtris come chei servidôrs che a spietin il paron cuant che al torne dongje des gnocis, par jessi pronts a vierzii la puarte a pene che al rive e al tuche. Furtunâts chei servidôrs che il paron, cuant che al torne dongje, ju cjatarà ancjemò dimots. Us al garantîs che al cjaparà sù un grumâl, ju fararà comodâ in taule e si metarà a servîju. E se, rivant tal cûr de gnot o denant di, al cjatarà i siei servidôrs ancjemò dimots, furtunâts mai lôr! Cirît di capî: se il paron di cjase al savès a ce ore che al capite il lari, nol lassarès butâ sotsore la sô cjase. Ancje vualtris tignîtsi pronts, parcè che il Fi dal om al rivarà cuant che mancûl sal spietais».

Alore Pieri i disè: «Mestri, cheste parabule le disistu dome par nô o par ducj?». Il Signôr i rispuindè: «Cui isal duncje il gastalt fedêl e savi? Il paron lu metarà soestant di ducj i siei servidôrs par che, tal moment just, i dedi a ognidun la sô part di spese. Furtunât chel servidôr se il paron, tornant, lu cjatarà che al lavore. Us al garantîs che i consegnarà la ministrazion di dute la sô robe. Ma se chel servidôr al ves di pensâ dentri di sè: Il paron si intarde a rivâ, e al tacàs a fâur malegraciis ai servidôrs e a lis siervis, a mangjâ e a bevi e a incjocâsi, il so paron al rivarà te di che

mancul sal spiete e intune ore che nol scrupule, lu cjastiarà cence remission e lu metarà tal côf dai servidôrs che nol è ce fidâsi. Il servidôr che al sa ce che al vûl il paron e nol spessee a fâlu, al sarà cjastiât cence remission. Invezit chel servidôr che, no savint ce che al vûl il paron, si comportarà in mût di mertâ un cjastic, al sarà tratât cun plui remission. Di fat chel che al à vût tant al varà di rispindi di tant, parcè che plui un al à vût e plui si pretindarà di lui.
Peraule dal Signôr.

Su lis ufiertis

Acete di bon voli, Signôr, i regâi de tô Glesie,
che tal to boncûr tu jai âs consegnâts par che tai ufrissi,
e cu la tô fuarce fasiju diventâ il misteri che nus salve.
Par Crist nestri Signôr.

Antifone a la comunion Sal 147,12.14

Jerusalem, dai glorie al Signôr,
cu la flôr dal forment lui ti sostente.

Daspò de comunion

La comunion cui tiei misteris
che nus salvi, Signôr,
e nus confermi te lûs de tô veretât.
Par Crist nestri Signôr.